

Gojgaeq 《Bing Iq Cangh Gaj》 Hawj Gou Rox Lailai



Gou doeg gvaq haujlai saw gangj gij gojgaeq boux yinghyungz haenx, hix roxyiuj haujlai saeh yinghyungz gamjdoengh vunz, hoeng gou geiqndaej ceiq maenh dwg 《Bing Iq Cangh Gaj》 bonj saw neix lo. Daegbieg dwg deng bouxcawj ndaw saw—— Cangh Gaj cungj cingsaenz gyaezguk caeuq dai cungj mbouj lau haenx gamjdoengh liuxliux.

Bonj saw gangj aen gojgaeq dwg yienghneix: Youq ndaw aen mbanj heuhguh Fangzmboujlingz, miz buzgeq singq Cangh ndeu, de vih baujhoh ndaw mbanj boux Bazluginh ndeu, deng bingfangz Yizbwnj gaj dai. Daeglan buzgeq Cangh Gaj dai iq couh mbouj miz bohme, buz lan song boux

doxbaengh doxing gvaq saedceij. Buz de deng gaj le, Cangh Gaj bienqbaenz lwgyax lo, de roxnyinh bang bingfangz Yizbwnj dwgcaengz yaek dai, couh gag mieng aeu vih buz de bauqcaez. Youq bak mbanj Mohyinzdu, Cangh Gaj ngamq bungzdaengz boux cinhcazyenz Loz Ginhbauj, boux au Loz neix couh dazyinx Cangh Gaj bae caeuq Cen duicangj doxraen, yienghneix de couh youq budui ndaej guh boux cinhcazyenz iq lo, de riengz budui bae daengz haujlai deihfueng hoenx ciengq caegguk hoenx haenx, daengzlaeng Cangh Gaj baengh Bazluginh caeuq gij saenqsim bonjfaenh, gaj le gij bingcaeg bang Yizbwnj haih dai

buz de haenx, bauqcaez lo, youh ginggvaq baihgwnz baecinj le, ndaej fag cungq boghog ndeu, de sikhaek baenz boux yinghyungz iq ndaw mbanj lo.

Doeg gvaq 《Bing Iq Cangh Gaj》 le, hawj gou rox haujlai. Gou daj ndawde rox aeu hag gij cingsaenz bing iq Cangh Gaj, daihdamj bae wngqdoi q saeh daengxcungq, mboujlwnh bungzdaengz gijmaz hojnanz, cungj mbouj ngaemgyaeuj fug saw. Ngoenzlaeng youq hagsib, swngghoz ndawde, gou gizgiz cungj aeu Cangh Gaj guh buengjyiengh, hag de daihdamj caeuq miz dungxcaiz, guh bouxvunz doi q sevei miz gungyen ndeu.

(Bwzduh/raiz Yinj Fuzgen/hoiz)

Duzmoed Iq


Singhiz roek, daxmeh soengq gou bae laeng daxgoeng guhcaemz, youq ranz daxgoeng gou yawjraen duzmoed iq caeuq duznong doxbuek, ciengz doxbuek neix cingqsaed le doxgiet goengrengz hung.

Miz doih moed ndeu gamz gij gwn, baenzbaiz baenzbaiz byaij ma rongz. Gyoengqde lumj lienhdang gvaq nei, buen doxgaiq gwn ciennieb dangqmaz, daengx doih baenzbaiz baenzbaiz yiengq “aen ndoeng” baihnaj haenx giz “ndoi iq” de byaij bae, gou ngvanh, aen ndoi de aiq dwg ranz gyoengqde ba. Youq gwnz roen gyoengqde ma ranz haenx, gyoengq moed deng duz non hung ndeu laengz roen, duznong neix aen ndang hung gvaq duzmoed haenx baenz cib boix, gou liengh gyoengq moed yaek cuengq gij doxgaiq roengzdaeuj le fugsaw lo, ndaw sim lij caegcaeg gouz goengmangh baujyouh gyoengq moed ndaej dai yiemj bienq an, mbouj miz maz saeh. Siengj mbouj daengz gyoengq moed iqet neix fanj cuengq gij gwn de roengzdaeuj caeuq duznong hungloet haenx doxbuek, duznong haenx yawj gyoengq moed lumj yawj deb byaek feih ndeu, caj gyoengqde gag soengq noh daengz bak daeuj. Duznong menhmenh raih bae depgaenh gyoengq moed iq haenx, byawz rox gyoengq moed mbouj deuz cixbah, cix doxcaeuq raih bae hoenx duznong haenx, aeu heuj haeb duznong. Bande duznong haenx cij rox gyoengq moed neix yaek hoenx de, de siengj deuz, hoeng gaenq nguh lo, gyoengq moed iq cungj haep de hwnjdaeuj liux.

Bang moed iq neix ak dangqmaz, gaenlaeng le ram duznong haenx ma ranz, miz haujlai moed iq ok rongz daeuj cieq, gyoengqde aeu song diuz mumh de doxlwnh haujlai nanz, naeuz dwg baenzlawz ndaej duznong de dauq.

Doengh duz moed mbouj doxgyau de caemh angqvauvau, lumj diuqfoux daeuj cieq bang moed iq de nei.

(faenzcieng ndei gwnz muengx Veiz Munlingz/hoiz)



Dwkbej



Miz bonj saw ndeu, de mbouj miz saek cih saw, cix dauqcawq cungj dwg yozvwn, gwnz saw mbouj miz mingz bouxraiz, hoeng moix boux vunz cungj dwg bouxraiz bonjsaw de, aen mingz bonj saw neix heuh 《Ndwenngoengz》, ndwenngoengz daezsingj raeuz haujlai haujlai.

“Swmungz, gou ok 10 mwngz aeu mbouj aeu.” Gij sing coi vunz baez gangj okdaeuj, caezgya cungj yawj coh gou. Neix dwg gij cingzgingj aen singhiz satbyai ndeu, gou caeuq geij boux baengzyoux guhdaih dwkbej.

“Gou aeu, caj yaep gonq, gou yawj ok mbaw bej lawz.” Gou doq ngaek gyaueuj doq youq fwngz bej luenhlablab gou ra bej.

“Vaiq di, cungj hawj dou caj mwngz ok bej, mwngz mbouj naengz moix baez cingjleix ndei bej ha……” Gizgiz mbouj naihfanz naeuz. Gou yawj baj bej ndei gwnz fwngz swhgeij, daekieq dwk han coenz ndeu: “Caj gou yaep ndeu baenzlawz la, mwngz yawj nw, gou mbouj cingjleix bej hix hingz ndaej sou.” Dahraix, mbat neix gou youh hingz lo, gou angq dwk bekwngz, riuha hwnjdaeuj. Daxmeh naengh youq henz gou, saeknaj mbouj aiq ndei dwk daengx gou da ndeu gangj: “Mbouj cingjleix bej, daengzdaeuj dwg hingz mbouj liux, mwngz mbat neix baengh caijsog ndaej hingz lo, mwngz mbouj hojnaengz baezbaz cungj miz caijsog yienghneix

ndei.” Gou cix mbouj haeujrwz riuhihi naeuz: “Haenx couh caj yawj.”

Lingh lwnz youh hainduj lo, Gizgiz ok mbaw 11 ndeu, ha, gou cingqngamj miz mbaw 13 ndeu, gou swnh fwngz couh ndek okbae lo, ndawsim gou gag angq, seiz gou cingq sim’ angq, gou baez nu bej, cij yawjraen lijimiz song mbaw 13 yo youq gyang bej gou.

“Mbaw 13 neix gou mbouj ok lo.” Gangj dwk gou couh iet fwngz yaek aeu mbaw 13 haxbaenh ngamq ok haenx dauq. Caemhseiz, fwngz daxmeh caeuq baengzyoux doengzseiz bek roengzdaeuj hemq naeuz: “Mbouj ndaej! Bej gaenq ok le couh mbouj ndaej caiq dawz dauqbae lo!” Gou simgip dwk singhung euq gangj: “Gou ok loek lo! Gou lij caengz yawj raen gwnz fwngz gou lij miz 13!” “Haenx ienq byawz, cijndaej ienq bonjfaenh mbouj cingjleix bej!” Daxmeh mizdi hozhwnj gangjnaeuz. Gou lumj bizgiuz laeuhheiq nei, naiqnuek naengh youq gwnz sahfaz ienqhoij dwk cig bek gyaueuj, sim siengj: Ae, cungjdwg aenvih gou mbouj cingjleix bej cij yienghneix ok loek, danghnaeuz gou mbouj ok mbaw 13 haenx, gou couh ndaej dawz sam mbaw 13 cuj baenz “cadan”, yienghneix lien bej gwnz fwngz gou couh swnhleih ok okbae lo.

Ginggvaq baez gyaueuj neix, baez dwk buenz bej ndeu gou cungj cingjleix ndei bej, ciemhciemh gou roxnyinh yienghneix guh, ok bej ndaej engq vaiq, lohnaemj engqgya cingcuj, caemhcai q gij bej yawjdaeuj mbouj ndei haenx, ginggvaq cingjleix caeuq cujhab, hix ndaej hingz, caemhseiz hix hawj gou roxnyinh daengz dwkbej dwg cungj doengh’ uk guhcaemz mizyinx ndeu.

Dwkbej yienznaeuz dwg ndaw ndwenngoengz cungj guhcaemz iq ndeu, hoeng de cix daezsingj gou: Ndaw ndwenngoengz mboujlwnh dwg guhcaemz, roxnaeuz dwg hagsib, cungj aeu hag rox doq guh doq faen loih cingjleix, caemhseiz ceiqrox cingjhab, yienghneix guh saeh lohnaemj hix engqgya cingcuj, engqgya miz diuzleix, engqgya mizyauq.

(Gyanghsuh Suhcouh Gohgicwngz Vaigozyij Yozyau Sau Yizsungh/raiz Nungz Cinfung/hoiz)